

大學衍義

一
卷
五
冊

學與治無二道也大學明新至善內聖外王之規一
以貫之矣孔子沒千有餘年而朱子作章句或問以
發明之平生所學祇此誠意正心四字出而仕也封
事奏劄以及經筵講義皆莫不以是爲說然後大學
之教復明於世西山真先生學朱子之學卽心朱子
之心且以大學爲君天下者之律令格例復爲衍義
獻之時君大學有綱有目而是編目之中又有綱焉
有目焉本末法戒粲然畢具昔司馬溫公進資治通
鑑蘇文忠公進陸贄奏議所謂監前世之興衰考當
今之得失聚古今之精英實治亂之龜鑑固已有

功於治道然視此書之美大純備則有不侔者矣惜未遇大有爲之君而使大學學治之極則卒不獲再見於後世也夫君者出治者也臣者輔君以出治者也要皆不可以不學使爲君者本是書以求臣爲臣者本是書以致君則學爲有用之學治爲有本之治下有責難陳善之臣上卽有建極綏猷之君明良一德治臻隆古猗歟休哉何其盛也苟或舍是而他學則將爲俗儒之記誦詞章老佛之清淨寂滅管商之權謀功利百家眾技之支離偏曲惑世誣民充塞仁義邪說橫流世變愈下其弊更有甚於朱子當日之

所嘆者然則是書之所係顧不重哉涇陽

柏子

餘素愛是書重取付梓以公同志學者果亦以是書
爲律令格例天德王道如是書所云一一熟講力行
必體明而用達異日立朝不貶道以求售不隨俗以
苟安不遷惑於眾口不狃滯於近規竭誠盡愼贊襄
啟沃必使吾君以是書爲心法卽以是書爲治法而
純儒之學純王之治皆有實效可徵斯亦世道之一
大轉機也歟光緒丁亥中冬晦前一日三原賀瑞麟
謹序

大學衍義序

臣始讀大學一書見其自格物致知誠意正心修身齊家至於治國平天下其本末有序其先後有倫蓋嘗撫卷三歎曰爲人君者不可以不知大學爲人臣者不可以不知大學爲人君而不知大學無以清出治之源爲人臣而不知大學無以盡正君之法旣又攷觀在昔帝王之治未有不本諸身而達之天下者然後知此書所陳實百聖傳心之要典而非孔氏之私言也三代而下此學失傳其書雖存槩以傳記目之而已求治者旣莫之或考

言治者亦不以望其君獨唐韓愈李翱嘗舉其說見於原道復性之篇而立朝論議曾弗之及蓋自秦漢以後尊信此書者惟愈及翱而亦不知爲聖學之淵源治道之根柢也況其他乎臣嘗妄謂大學一書君天下者之律令格例也本之則必治違之則必亂近世大儒朱熹嘗爲章句或問以析其義

寧皇之初入侍

經帷又嘗以此書進

講願治之君儻取其書玩而繹之則凡帝王爲治之

序爲學之本洞然於胷次矣臣不佞竊思所以羽翼是書者故剡取經文二百有五字載於是編而先之以堯典皋謨伊訓與思齊之詩家人之卦者見前聖之規模不異乎此也繼之以子思孟子荀況董仲舒揚雄周敦頤之說者見後賢之議論不能外乎此也

以上論帝王爲治之序

堯舜禹湯文武之學純

乎此者也商高宗周成王之學庶幾乎此者也漢

唐賢君之所謂學已不能無悖乎此矣而漢孝元

以下數君之學或以技藝或以文辭則甚謬乎此

者也

以上論帝王爲學之本

上下數千載閒治亂存亡皆繇

是出臣故斷然以爲君天下之律令格例也雖然
人君之學必知其要然後有以爲用力之地蓋明
道術辨人材審治體察民情者人君格物致知之
要也明道術之目有四曰天性人心之善曰天理人倫之正曰吾道異端之分曰王道霸術之
異辨人材之目亦有四曰聖賢觀人之法曰帝王
知人之事曰姦雄竊國之術曰檢邪罔上之情審
治體之目有二曰德刑先後之分曰義利重輕之
別察民情之目亦有二曰生靈嚮背之由曰田里
戚休之實崇敬畏戒逸欲者誠意正心之要也崇敬畏
六曰修己之敬曰事天之敬曰臨民之敬曰治事
之敬曰操存省察之功曰規儆箴戒之助戒逸欲
之目有五曰沈湎之戒曰荒淫之戒曰盤游之戒
曰奢侈之戒而先之以總論者所以兼戒四者之
也失謹言行正威儀者修身之要也
其事無重妃匹

嚴內治定國本教戚屬者齊家之要也

重妃匹之目有四曰

謹選立之道曰賴規儆之益曰明嫡媵之辨曰懲廢奪之失嚴內治之目有四曰宮闈內外之分曰宮闈預政之戒曰內臣忠謹之福曰內臣預政之禍定國本之目有四曰建立之計宜蚤曰諭教之法宜豫曰嫡庶之分宜辨曰廢奪之失宜監教戚屬之目有二曰外家謙謹之福曰外家驕溢之禍

四者之道得則治國平天下在其中矣每條之中首以聖賢之明訓參以前古之事蹟得失之鑑炳然可觀昔者入侍

邇英蓋嘗有志乎是比年以來屏居無事迺得繙閱經傳彙而緝之畎畝微忠朝思暮繹所得惟此祕之巾笥以俟時而

獻焉其書之指皆本大學前列二者之綱後分四者
之目所以推衍大學之義也故題之曰大學衍義
云臣德秀謹序

尙書省劄子

中奉大夫新除權戶部尙書眞德秀劄子奏臣聞聖人之道有體有用本之一身者體也達之天下者用也堯舜三王之爲治六經語孟之爲教不出乎此而大學一書繇體而用本末先後尤明且備故先儒謂於今可見古人爲學次第者獨賴此篇之存而論孟次之蓋其所謂格物致知誠意正心修身者體也其所謂齊家治國平天下者用也人主之學必以此爲據依然後體用之全可以默識矣恭惟

陛下有高宗之遜志時敏

有成王之緝熙光明

卽位以來無一日不

親近儒生無一日不

講劘道義自昔好學之君未有加焉者也臣昨值龍
飛之初獲陪講讀之末嘗欲因大學之條目附之以
經史纂集爲書以備清燕之覽恩恩去

國志弗之遂而臣區區愛

君憂

國之念雖在畎畝未嘗少忘居閒無事則取前所爲
而未遂者朝夕編摩名之曰大學衍義首之以帝王

爲治之序者見堯舜禹湯文武之爲治莫不自心身始也次之以帝王爲學之本者見堯舜禹湯文武之爲學亦莫不自心身始也此所謂綱也首之以明道術辨人材審治體察民情者格物致知之要也次之以崇敬畏戒逸欲者誠意正心之要也又次之以謹言行正威儀者修身之要也又次之以重妃匹嚴內治定國本教戚屬者齊家之要也此所謂目也而目之中又有細目焉每條之中首之以聖賢之典訓次之以古今之事迹諸儒之釋經論史有所發明者錄之臣愚一得之見亦竊附焉雖其銓次無法論議無

取然人君所當知之理所當爲之事粗見於此

陛下親政之始而臣書適成爲卷四十有三爲帙二十有二輒因召

對冒昧以

聞伏望

聖慈察臣一念愛

君之篤

矜臣十年用功之勤特降

睿旨許臣投

進而

陛下於機政之暇

講讀之餘

賜以

覽觀其於

體用之學不無秋毫之補取

進止九月十四日三省同奉

聖旨疾速投進

右劄送

新除權戶部眞尙書

端平元年九月十五日

中書門下省時政房申狀

翰林學士中奉大夫知制誥兼侍讀眞德秀照對九月十三日蒙

恩內引奏事乞將所撰大學衍義一書投進面奉

玉音賜允繼準

省劄備奉

聖旨疾速投進遂于十月初二日具表于通政司進
入次日後殿聚講恭被

聖諭卿所進大學衍義一書有補治道

朕朝夕觀覽德秀下殿拜謝而退又于今月十四日

輪當

進讀大學章句既畢忽蒙

聖訓卿所進衍義之書便合就今日進讀德秀私謂
前所

進本已納

禁中必須令講筵所別寫然後可以進讀遂以未辦
爲對

聖訓云已在此矣卽見內侍捧元進第一第二帙在
前德秀奏云臣所纂輯之書出於愚陋之見豈足以
上裨